

Oqaasiliortut 17/03-2021 ataatsimiinnerannit imaqarniliaq


Peqataasut:

Oqaasiliortut: Mariia Simonsen (siulittaasoq), Karen Ramsøe (siulittaasup tullia), Knud Møller & Hans Kristian Olsen

Oqaasileriffimmit: Lisathe Møller (allatsi) & Minik Jeremiassen (pisortaagallartoq)

Oqaluuserisassat:

1. Oqaluuserisassat akuerineqarnerat.
2. Kingullermik ataatsimiinnermit imaqarniliap akuerineqarnera.
3. Siulittaasumit Oqaasileriffimmillu ilisimatitsissutit.
 - a. *Oqaasileriffimmit ilisimatitsissutit*
4. Suliataq allat pillugit ilisimatitsineq
 - a. *Inuit aqqi pillugit saaffiginnissutit*
5. Suliataq allat:
 - a. *Oqaasileriffimmit KNR-imut oqaatsinik kiffartuussisup KNR-imik suleqateqarnini pillugu nassuiaanera*
 - b. *Taaguutit ordboginiittut Taaguutaasivimmut iliorarnissaannik Oqaasileriffiup kissaataa*
 - c. *Oqaasiliortut periusissiaat (strategi)*
6. Kalaallisut taaguusigassat:
 - a. *Isikkamik-arsarnermi taaguusersuutit akuerineqarnissaat*
7. Ataatsimiinnissap tulliata ullulerneqarnera.
8. Tamalaat.



Imaqarniliaq

1. Oqaluuserisassat akuerineqarnerat

Oqaluuserisassat akuerineqarput.

2. Kingullermik ataatsimiinnermit imaqarniliap akuerineqarnera.

10/2-2021 ataatsimiinnermit imaqarniliaq akuerineqarpoq.

3. Siulittaasumit Oqaasileriffimmillu ilisimatitsissutit.

a. Siulittaasup ilisimatitsissutigaa Oqaasiliortut kissaataat naapertorlugu Telepost allaffigineqarsimasoq allattaaseq pillugu aalajangersakkanik erseqqissaataasunik. Allakkat takussutissatut ilanngunneqarput.

b. *Oqaasileriffimmit ilisimatitsissutit* tusaatissatut tiguneqarput.

4. Suliat allat pillugit ilisimatitsineq

a. *Inuit aqqi pillugit saaffiginnissutit* tusaatissatut tiguneqarput.

Ataatsimiinnerup kingulliup kingorna (10/2-2021) aqqit Oqaasiliortunit akuersissutigineqartut:

- Nukappiaqqap aqqa Raalu ilaasortanit tamanit akuersissutigineqarpoq.
- Nukappiaqqap aqqa Angutaaluk ilaasortanit tamanit akuersissutigineqarpoq.
- Nukappiaqqap aqqa Angerlaq ilaasortanit tamanit akuersissutigineqarpoq.
- Niviarsiaqqap aqqa Paqqi ilaasortanit tamanit akuersissutigineqarpoq.

5. Suliat allat:


a. *Tusagassiutinut oqaatsinik kiffartuussisup KNR-imik suleqateqarnini pillugu nassuiaanera.*

KNR Radiup kalaallit oqaasiinik atuinermut tunngatillugu kiffartuunneqarsinnaatitaanini tigulluarlugu atorluartarpaa, piffissalli ilaanni KNR-imi atorfillit ulapputeqartarnerisa kingunerisaannik suleqateqarneq killeqartarluni. Tusagassiorfinnik kiffartuussisup kiffartuussinnginnermi nalaani tusagassiutini kalaallisut kukkusumik atuisarnerit nalunaarsorlugillu malinnaavigisarpai. KNR TV-p, Sermitsiap AG-llu kalaallisut oqaatsinik kiffartuunneqarsinnaanermik periarfissaq atorneq ajorpaat, pissutsilli taama ikkaluartut oqaatsinik kiffartuussisup ataatsimut ilisimatitsissutinik tamanut paasissutissiisarnini ingerlatiinnarpaa.

2020-mi oqaatsinik kiffartuussisumut saaffiginninnerit 67-iupput.

b. *Taaguutit ordboginiittut Taaguutaasivimmu iliorarnissaannik Oqaasileriffimmit kissaat.*

Taaguuterpassuit (termer) ordbogimiittut atorneqalereerlutik taaguutitut sungiunneqarsimalereerput, Oqaasiliortunilli akuerineqarsimanatik.



Taaguutit Oqaasiliortut akuerisaat Oqaasileriffiup nittartagaani taaguutaasivimmiippit (termbank), tamanillu misissorneqarlutillu ujarlerfigineqarsinnaallutik. Oqaasileriffik pisinnaatinneqarpoq taaguutit (termer) ordbogini ukunaniittut taaguutaasivimmut (termbank) iliorarneqarsinnaasut:

- OQAASERSIUUT – qallunaatut – kalaallisut (2012)
- OQAATSIT – kalaallisuumit qallunaatumut (1997)

Oqaasiliortut kissaatigivaat taaguutit (termer) ordbogineersut taaguutaasivimmut (termbank) Oqaasileriffiup nittartagaaniittumut sukkanerusumik iliorarneqassasut. Oqaasiliortut periarfissatut isigaat Oqaasiliortut pillugit Inatsisartut inatsisaanni nr. 5, 1. Juni 2017-imeersumi § 2.8, immikkoortoq 4-miittoq: *“Oqaasiliortut suliassat aalajangersimasut naammassiniarlugit piffissami killilikkami ataatsimiititaliat pilersissinnaavaat, suleqatigiit imaluunniit suliaqaqatigiit Oqaasiliortunit ilaasortaaffigineqartut imaluunniit avataaneersunit immikkut suliatigut piginnaasalinnit peqataaffigineqartut”*. Oqaasiliortut periarfissaq taanna atorneqarsinnaanersoq pillugu Oqaasileriffik misissuissasoq piumasaqarput. Tamanna pisinnaanngippat Oqaasileriffiup iluani sulisut ikiortaata atorluarneqarsinnaapput. Ikiortinilli suliarineqassappata piffissaq sivisooq atorlugu suliarineqassammata Oqaasiliortut kissaatigisamittut sukkanerusumik ordbogini qulaani taaneqartuniittut taaguutit (termer) taaguutaasivimmut (termbank) iliorarneqarnissaat. angorusuppaat. Taaguutit (termer) ordboginiittut taaguutaasivimmut (termbank) iliorarneqarnissaannut periarfissanik Oqaasileriffik misissuissaaq.


c. *Oqaasiliortut periusissiaat (strategi)*

Oqaasiliortut periusissiassaattut Oqaasileriffimmit suliaagallartoq ataatsimut isigalugu paasiuminartutut nalilerneqarpoq, ilusissaviatalu oqallisiginissaanut aallarniutissaqqissutut isigineqarluni.

Oqaasiliortut kissaatigaat uku quppernemi siullerniissasut; naammasserusutat (mission), anguniagassatut takorluukkat (vision) kiisalu iliuusissatut pilersaarussiaq (handlingsplan). Oqaasiliortut suliaasaqarfiisa suunerinik nassuiaatigineqartut kingullingortissasut siunnersuutigineqarpoq. Oqaasiliortut oqaatigaat Oqaasiliortut suliaasaqarfiinik Oqaasileriffimmi suliaqartut assigiinngitsut suliaasaqarfigisaanni naammasserusutat (mission), anguniagassatullu takorluukkat (vision) erseqqinnerusariaqartut, kiisalu iliuusissatut pilersaarussiaq aamma erseqqinnerusariaqartoq. Taaguusersuutilerineri pineqartut 2024 ilanngullugu pilersaarusioneqareersut erseqqereerput, sinnerinili anguniagassalersorlugillu ukiulersornissaat Oqaasiliortunit kissaatigineqarpoq. Oqaasiliortut siunnersuutigaat Oqaasileriffimmi suliaasaqarfinni assigiinngitsuneersut atorfilittatut akisussaasuisa qulaani Oqaasiliortunit kissaatigineqartut malillugit missingersuusiussasut, kingornalu Oqaasileriffimmi aqutsisumut anngullugit.

6. Kalaallisut taaguusigassat:

a. *Isikkamik-arsarnermi/arsaannermi taaguusersuutit* akuerineqarnerat



Isikkamik-arsarnermi/arsaannermi taaguutit makku akuerineqarput:

<i>finte</i>	salloqittaaneq (<i>kingullermik ataatsimiinnermi ima taaguuserneqaraluarpoq salloqittaariarneq</i>)
<i>forfinte</i>	salloqittaariarneq
<i>forhale</i>	kinguarsarpaa
<i>forlænget spilletid</i>	unamminerup sivitsorneqarnera
<i>formel træning</i>	siunertaqarluni sungiusarneq
<i>forseelse</i>	unioqqutitsineq
<i>forsvar</i>	kinguarsimasut
<i>forsvar i balance</i>	naleqquttumik assersuineq
<i>forsvar i ubalance</i>	naleqqutinngitsumik assersuineq

7. Ataatsimiinnissap tulliaata ullulerneqarnera.

Pingasunngorneq 14/4-2021, nal. 13-16.

8. Tamalaat.

Oqaasiliortut kissaatigaat taaguutaasivik (termbank) Oqaasileriffiup nittartagaaniittoq taaguutiniik (term) Oqaasiliortut akuerisaannik imaqartoq nittartakkami erseqqinnerulersinneqassasoq. Saqqaaniittoq ujarlerfissiaq "Ujarlerit"-mik allassimasoq, nittartakkap iluaniittunik Katersallu imarisaanik imalik, ataanut inissinneqassasoq siunnersuutigineqarpoq. Nutaarsiassat Oqaasileriffiup saqqummersittaligaa filitut inituallaarmat (20 MB) mobildatamik atuisut eqqarsaatiginerullugit inikinnerusunngorlugit saqqummiunneqartalernissaat eqqarsaatigeqquneqarpoq.

Ataatsimiinnermi peqataasut:

Mariia Simonsen
siulittaasq

Karen Ramsøe
siulittaasup tullia

Hans Kristian Olsen
ilaasortaq

Knud Møller
Ilaasortaq